



Godišnji izvještaj za 2019. godinu

Protekla godina je za Fondaciju Stariji brat, starija sestra bila godina postignuća i novih početaka. Mnogo novih stvari je započeto i urađeno po prvi put u 2019. godini o čemu će biti više riječi u ovom izvještaju.

Ko smo mi?

Fondaciju Stariji brat, starija sestra osnovalo je Udruženje za prevenciju ovisnosti NARKO-NE koje vodi i koordinira rad Fondacije. NARKO-NE je osnovao Mrežu SBSS BiH koju je činilo 11 organizacija iz 5 bh gradova, te je Fondacija naslijedila kapacitete i resurse Mreže. Fondacija trenutno nema zaposlenih, ali ima tim vrijednih volontera i volonterki koji rade na promociji i namicanju sredstava u naš fond.

Šta je novo kod nas?

Prošle godine došlo je do administrativnih promjena u Fondaciji, stoga se sad nalazimo na novoj adresi Josipa Vančaša 21 u Sarajevu, urađene su i izmjene i dopune Statuta, a imamo i nove članove i članice Upravnog odbora. Također, Fondacija sad ima puni naziv Fondacija za podršku i razvoj mentorskih programa Stariji brat, starija sestra, ali mi od milja kažemo Fondacija SBSS.

Šta se dešavalo u Fondaciji SBSS u 2019.godini?

Projektni ciklus 2018/2019

U 2018/2019 godini Program Stariji brat, starija sestra je implementiran u 7 gradova u BiH od strane 11 organizacija, a sve uz podršku Fondacije SBSS. Ukupno je formirano 153 para djece i volontera i volonterki od čega je njih 30 nastavilo druženje iz prethodnog ciklusa i koji su ukupno proveli 27.540 sati družeći se i kvalitetno provodeći slobodno vrijeme.

Održane su ukupno 62 grupne aktivnosti koje su uključivale razne vrste sporta, edukacije, kulturnih i zabavnih manifestacija. Za volontere i volonterke, organizirano je ukupno 202 savjetodavna sastanaka, individualnog i grupnog karaktera.

Izvršena je ulazna i završna evaluacija na nivou Fondacije u kojoj je pokazano da su djeca uključena u Program poboljšala svoj uspjeh i ponašanje u školi i kući, kao i razvoj različitih socijalnih i životnih vještina. Osim u školi, vidljivo je i povećanje uspjeha u vannastavnim i sportskim aktivnostima, te je povećano učešće djece u kulturnim događanjima, kao i boravak u prirodi.

Fundraising kampanje

Tokom ljeta, 10 vrijednih volontera i volonterki radilo je na implementaciji kampanje Trčimo zajedno za dječji osmijeh broj 2. Kampanja je održana u suradnji sa Udruženjem Marathon iz Sarajeva i prikupljeno je ukupno 3.423,38 KM od različitih donatora.

Također u decembru se okupilo 14 volontera/ki u fundraising i promotivnom timu koji će implementirati kreativnu kampanju tokom proljeća 2020.



Naš glavni donator i ove godine je Fondacija Medicor iz Lihtenštajna, te su u 2019. godini odobrena i dodatna sredstva od strane organizacije Renovabis iz Njemačke.

Promocija

Pokrenuli smo web stranicu mentorstvo.ba na kojoj je u 2019. godini objavljeno 11 članaka i volonterskih priča.

Broj pratitelja na društvenim mrežama je porastao (FB: 2489, instagram: 298), a pokrenuli smo i profil na Twitteru.

Tokom kampanje Trčimo za dječji osmijeh [gostovali smo u emisijama](#) 4 TV kuće u Sarajevu, a većina [medijskih portala](#) je popratila dešavanja u kampanji.

Zajedno sa Udruženjem za prevenciju ovisnosti NARKO-NE proslavili smo [Međunarodni Dan volontera/ki](#) 5.12. u Sarajevu zajedno sa 50 volontera na kojem smo organizovali i photo sesiju na temu [Ja volontiram, a ti?](#)

Ciklus 2019/2020

U augustu 2019. prvi put je objavljen [javni poziv za sufinansiranje implementacije Programa Stariji brat, starija sestra](#), sa mogućnošću prijave preko platforme mentorstvo.ba. Prijavljena je ukupno 21 organizacija, od čega je Komisija za evaluaciju projektnih aplikacija odabrala 8 organizacija, od kojih su 3 nove organizacije koje prvi put implementiraju ovaj projekt u svojim zajednicama (Brčko, Doboje, Modriča).

Održani su sastanci sa novim organizacijama koje su upoznate sa Standardima implementacije Programa, a konsultovali smo se i sa koordinatorima starih organizacija o nastavku naše suradnje. Početkom novembra organizirali smo [edukaciju za 8 novih koordinatora i koordinatorica](#) koji su dalje nastavili sa selekcijom i edukacijom novih volontera i volonterki čime je započeo ciklus 2019/2020. godine.

Šta smo naučili?

Pitali smo naše volontere i volonterke šta je za njih bilo najznačajnije i šta su naučili u 2019 godini, evo šta su odgovorili:

Kroz ovaj projekt prije svega upoznala sam samu sebe, ali i druge fantastične mlade ljude. Imali smo priliku da učimo, razvijamo i poboljšamo naše komunikacijske vještine.

Jovana (21) Banja Luka

Ono što mene čini ponosnom jeste kada vidim da moja mlađa sestra i pored svega toga što zna, uspije iz naših izlazaka, naših razgovora uvijek naučiti nešto novo, kao i ja od nje. Djeca su divna bića, neiskvarena, potpuno iskrena i uvijek spremna da vas uvedu u svoj svijet čarolije u kojem bar na trenutke možete da se opustite od svakodnevnih briga oko ispita, posla i plaćanja računa.

Merima (22) Tuzla

Napraviti razliku u njenom životu (moje mlađe sestre), samim tim što napravite razliku u njenom jednom danu sedmično. Smanjite njenu usamljenost, nasmijete je, utješite je,



saslušate je, razgovarate s njom i u svemu tome, zabavite se. Iskreno, jer djeca su takva. I što je najbolje, pruže vam sve to nazad, ako ne i više. Jer ne mjere i ne kalkulišu, prosto vas vole.

Sara (24) Mostar

U projekat sam ušla da pružim djeci nešto novo, ali na kraju djeca su bila ta koja su ostavila veliki trag u našim srcima i naučila nas da su stvari puno ljepše kad se ne gleda očima već srcem. Ovo iskustvo koje sam stekla volontiranjem, i ove uspomene koje smo zajedno izgradili su nezaboravne.

Sumeja(25) Sarajevo

Veza koju smo izgradili moj mlađi brat i ja bazirana je na povjerenju i sigurnosti jer smo i najmanji problemčić ili dilemu rješavali skupa i čuvali kao vrijednu tajnu. Navikli smo se jedno na drugo i svaki naš susret i rastanak počinju i završavaju zagrljajem i poljupcem. Iskustvo koje sam stekla kroz ovih nekoliko mjeseci je neprocjenjivo i kada god bi mi se pružila prilika ponovila bih ga opet. Neopisiva je ta veza koja se izgradi, ljubav koja sve to poveže i sigurna sam da će ovo naše druženje trajati kroz godine koje dolaze.

Anamarija (23) Zenica

Volontiranjem u Fondaciji naučila sam nove načine za pisanje objava na društvenim mrežama, a da pri tome animiram veći broj ljudi. Samo traženje kontakata mi je osvijestilo to da u BiH postoji mnogo kompanija za koje uopšte nisam znala, a ostvaruju značajne prihode. Naučila sam korisnije provoditi vrijeme na internetu i to da se do svake osobe može doći ako se potrudiš dovoljno. Uživala sam radeći sa ovim timom, i samo zajedno i ravnomjernom raspodjelom posla možemo ostvariti značajne rezultate.

Amina (24) Sarajevo

Planovi za budućnost

U narednoj godini pored redovnih aktivnosti u programskom ciklusu, planiramo još raditi na reviziji Standarda za implementaciju Programa Stariji brat, starija sestra kao i razvijanti nove modele mentorstva. Želimo okupiti sve nekadašnje volontere i volonterke kao i suradnike i partnere u Alumni grupu Stariji brat, starija sestra i razviti komunikaciju preko zatvorenog Foruma mentorstvo.ba.

A tu su i naši novi volonteri i volonterke koji planiraju implementacije novih kreativnih fundraising i promotivnih kampanja.

Nadamo se da ćete i dalje pratiti rad Fondacije Stariji brat, starija sestra i da ćemo i dalje imati vašu podršku u gradnji zdravijeg i boljeg društva za sve nas.